

Visoki predstavnik i specijalni predstavnik EU Miroslav Lajčák sastao se sa premijerom RS Miloradom Dodikom



U okviru razgovora sa najvišim političkim zvaničnicima u BiH, visoki predstavnik i specijalni predstavnik Evropske unije, Miroslav Lajčák, danas se u Banja Luci sastao sa predsjednikom SNSD-a i predsjednikom Vlade RS Miloradom Dodikom.

Na sastanku HR/EUSR Lajčáka i premijera Dodika bilo je riječi o aktuelnoj političkoj situaciji u zemlji i nizu otvorenih pitanja za koja je neophodno pronaći rješenje kako bi BiH napredovala ka ispunjenju obaveza iz Sporazuma o stabilizaciji i pridruživanju te pomacima koje Bosna i Hercegovina čini u ispunjavanju pet ciljeva i dva uslova koje je postavilo Vijeće za implementaciju mira za tranziciju OHR-a u EUSR.

Visoki predstavnik i specijalni predstavnik EU, Miroslav Lajčák, i premijer Dodik složili su se da je neophodno uložiti dodatne političke napore kako bi se postigla rješenja prihvatljiva za sve građane BiH. U tom smislu, razmotrena je i podržana ideja održavanja zajedničkog sastanka lidera šest vladajućih stranaka kako bi i na taj način BiH bila što spremnija da učini nove pomake na jesen.

“Rješavanje pitanja državne imovine zahtijeva dodatni politički napor svih strana”, rekao je HR/EUSR Lajčák i pozvao lidere da nastave aktivnosti na temeljima principa koje je definisala Komisija za raspodjelu državne imovine u oktobru prošle godine. “Ovo je pitanje važno ne samo stoga što je od strane Vijeća za implementaciju mira postavljeno kao jedan od uslova za tranziciju OHR-a u EUSR već i zato što će BiH na taj način pokazati da je spremna sama rješavati pitanja koja su od ključne važnosti za evropsku budućnost zemlje”, rekao je HR/EUSR Lajčák.

Nastavljajući bilateralne sastanke sa političkim zvaničnicima, visoki predstavnik i specijalni predstavnik EU, Miroslav Lajčák, sutra će se u Sarajevu sresti sa predsjednikom HDZ-a BiH Draganom Čovićem.